



REPUBLIKA E KOSOVËS

KUVENDI I KOMUNËS-VUSHTRRI

PROCESVERBAL
NGA MBLEDHJA URGJENTE E KUVENDIT TË KOMUNËS SË VUSHTRRISË,
MBAJTUR MË 26 MARS 2020

Mbledhja është mbajtur në objektin e shkollës së mesme, Gjimnazi "Eqrem Çabej" në Vushtrri, duke filluar në orën 16:40.

Në këtë mbledhje ishin të pranishëm anëtarët e Kuvendit të Komunës së Vushtrrisë:
Abdullah Vojvoda, Agim Bregaj, Agron Perçuku, Arta Ymeri, Basri Menxhiqi, Bahrije Ademi Murati, Fatmire Saraçi, Ermal Lahu, Fakte Dushi, Faton Shabani, Gresa Muli, Habibe Gërxhaliu, Ilmi Azemi, Kushtrim Hyseni, Hajriz Mustafa, Lorik Maxhuni, Miljan Bojković, Mehdi Bejtullahu, Mejreme Ismajli, Nasuf Aliu, Nezir Klinaku, Nurtene Çerkezi-Gyshinca, Sajdie Bajgora, Selim Rrustemi, Shkëlzen Feka, Shpëtim Zhegrova, Safet Idrizi, Melihate Basholli-Latifi, Suzana Sylja, Teuta Aruçi Shartari dhe Ymer Haradinaj.

Munguan: Ali Januzi, Hysni Gërguri, Fitim Halili dhe Gentiana Rama.

Të pranishëm në këtë mbledhje ishin edhe Kryetari i komunës, z.Xhafer Tahiri dhe nënkryetari i komunës z. Besim Muzaqi, drejtorë të drejtorive komunale dhe zyrtarë kompetent komunal.

Ilmi Azemi, anëtar i kuvendit - në emër të grupit kuvendar të PDK-së lidhur me pandeminë Corona Virus - covid-19, dëshirojmë të shprehim gatishmërinë tonë për kontribut pozitiv në luftimin e kësaj lufte të egër me një armik të padukshëm që po kalon Kosova e qyteti ynë, si dhe gati të gjitha vendet e globit. Ne konsiderojmë se qeveria komunale ka vepruar drejt dhe me kohë duke ndërmarrë hapa konkret, sidomos duke paralajmëruar në kontinuitet qytetarët dhe duke dhënë instruksione konform shkallës së rrezikut. Qeveria komunale në zbatim të vendimit të Qeverisë së Kosovës nr.01/07 dhe me rekomandim të Këshillit Komunal për Siguri në Bashkësi më datë 12 mars 2020 ka themeluar shtabin komunal anti Covid-19. Ky shtab konsideroj se ka kryer me përkushtim dhe përgjegjësi punën e vet në menaxhimin e situatës, por konsideroj gjithashtu se ka hapësirë që edhe më mirë të funksionalizohet ky shtab, andaj kundrejt kësaj ne kemi vërejtje dhe konsiderojmë se pjesë e shtabit është dashtë të jenë edhe opozita së paku me dy anëtarë, jo për të marrë ndonjë primat apo privilegj, por thjesht për faktin se jemi grupi më i madh kuvendar dhe konsiderojmë se do kishte pas mundësi të kontribuojmë në ngritjen e performanses së shtabit komunal anti covid-19. Sidoqoftë ne do e përkrahim punën e shtabit në vazhdimësi dhe jemi në dispozicion 24 për të bashkëpunuar dhe për të dhënë kontributin tonë në të mirë të qytetarëve, kurse pjesëmarrja jonë në shtab mbetet në përgjegjësinë e kryetarit të komunës. Ne në vazhdimësi kemi përcjell dhe u kemi dhënë përkrahje organeve qendrore dhe

lokale në ndërmarrjen e masave preventive, por ne si kuvend sot do të diskutojmë lidhur me masat anti Covid-19 në nivel komune dhe shqyrtimin e propozim-vendimit për rialokimin-transferin e mjeteve nga kategoria e investimeve kapitale në kategorinë mallra dhe shërbime pika 1, si dhe pika 2 Shqyrtimi i propozim-vendit për ndarjen e mjeteve financiare për blerjen e artikujve të ndryshëm për parandalimin dhe mbrojtjen nga pandemia corona virus apo covid – 19. Sipas propozim-vendimit vlera totale e propozuar për rialokim është 100.000,00€, ne sigurisht që e përkrahim këtë propozim- vendim, por propozimi i grupit kuvendar është që të dyfishohet kjo vlerë sepse nevojat për përkrahje janë shumë të mëdha andaj propozojmë që kjo vlerë të ndryshohet dhe të votohet transferi në vlerë prej 200.000,00€, duke dyfishuar pozicionet e propozuara 100.000.00€, propozoj të transferohen nga kodi 41424 -Ndërtimi i rrugëve në këtë kod kemi 470.000,00€ dhe pas transferit mbeten 370.000,00€. Gjithashtu kemi edhe Fondin rezervë të alokuar për Komunën Vushtrri nga Qeveria e Kosovës që mund ta përdorni në rast përkeqësimi. Propozimi jonë kërkoj të përkrahet edhe nga qeveria komunale, si dhe nga të gjithë deputetët sepse siç e dini pandemia tani është në fazën e saj kritike të përhapjes dhe fatkeqësisht ka prekur edhe qytetarë të komunës sonë e që në këtë rast japim komplimente në mënyrën e mbikëqyrjes me kohë dhe identifikimin e izolimin e këtij rasti nga ana e shtabit komunal dhe stafit mjekësor komunal, por komplimente e lëvdata edhe për Policinë e Kosovës dhe të gjithë akterët që kanë kontribuar e po vazhdojnë të kontribuojnë në këtë drejtim. Të nderuar, ne e dimë që gjendja sociale e një pjese bukur të madhe të qytetarëve tanë ishte e rëndë edhe para se të vetizoheshin, tani kjo situatë është rënduar edhe më shumë, ta keni parasysh se një pjesë bukur e madhe e qytetarëve kanë jetuar nga të hyrat ditore që kanë punuar, në sektorin privat një pjesë e tyre nuk do të ketë mundësi t'i paguajë pagat në mungesë të aktivitetit të tyre biznesor e të mos flasim edhe për kategoritë që mezi mbijetojnë me social, andaj dyfishimi i kësaj ndarje buxhetore konsideroj se është i pashmangshëm. Gjithashtu i propozoj kryetarit dhe qeverisë komunale që menjëherë të adresojë kërkesa në nivel qendror për përkrahje financiare për qytetarët tanë në mënyrë që ta tejkalojmë këtë situatë. Gjithashtu ftoj të gjithë njerëzit e vullnetit të mirë të tregojnë solidaritet, i cili është shumë i nevojshëm për mbijetesën e një pjese të shoqërisë sonë.

Nezir Klinaku, anëtar i kuvendit- pakoja ekonomike e Komunës së Vushtrrisë, konsideroj se është në rregull, duke filluar nga: Propozim-vendimi për lirim nga pagesat dhe taksa e qirasë komunale për pronat e dhëna në shfrytëzim dhe shfrytëzim të Hapësirave Publike në qytet. Propozim-vendimi për lirim nga pagesa e tarifave në institucionin për edukimin dhe arsimimin parashkollor publik në Komunën e Vushtrrisë, si dhe Propozim-vendimin për ndarjen e mjeteve financiare për klubet sportive Të tria këto Propozim-vendime do ti votoj, por jo edhe një Propozim-vendim, gjoja për iniciimin e studimit mbi ndikimin e Covid-19 në ekonominë formale e jo formale në Komunën e Vushtrrisë siç e quani ju për masat e rimëkëmbjes ekonomike pas pandemisë. Më thuani kush po iu pengon ta bëni një studim të tillë, fundi i fundit qytetarët ua kanë dhënë besimin të qeverisni e edhe të bëni studime të tilla, pse keni nevojë të kërkonit nga Kuvendi i Komunës për një iniciim siç e quani ju. Vazhdoni ta menaxhoni situatën pandemike, fati ka dashtë që nuk kemi shpërthim të virusit, sepse qytetarët tanë kanë treguar se janë shumë të disiplinuar dhe po i respektojnë masat e Institutit Kombëtar të Shëndetit Publik, pa dashtë ta mohoj edhe punën që po bëni si Shtab Emergjent. Pra, sa i përket këtij Propozim-vendimi, konsideroj se nuk është asgjë tjetër përveç se një arsye për rrijetet sociale. Unë mendoj se ju duhet t'a bëni një analizë të detajuar se çfarë ndikimi ka pasur Covid-19 në secilin biznes të Komunës, e pastaj të vini në kuvend me një analizë të tillë e të shohim pastaj çfarë mund të bëjmë. Ndoshta do të paraqitet nevoja për ndërhyrje në Strategjinë për Zhvillim Ekonomik Lokal 2019-2023. Nuk

ka nevojë askush të fshehët pas pandemisë që pastaj edhe mund të bëhen keqpërdorime, jemi këtu për të parë transparencën ashtu siç po proklamohet.

Bahrije Ademi Murati, anëtare e kuvendit-në emër të grupit kuvendar të LVV-së e përkrahi propozimin për rritjen e mjeteve financiare dhe bëri apel që kuvendi të shkojë direkt në votim, duke i shmangur diskutimet.

Agron Përçuku, anëtar i kuvendit - në emër të grupit kuvendar të LDK-së e përkrahi propozim-vendimin për rialokimin e mjeteve financiare të komunës dhe propozoi që shtabit emergjent t'i bashkëngjitet edhe një pjesëtar i komunitetit farmaceutik. Pastaj ai pyeti se si janë duke funksionuar qendrat e mjekësisë në komunën tonë, sidomos ato nëpër fshatra, pastaj komuna a ka kontraktuar kompani për dezinfektimin e objekteve publike ku frekuentojnë qytetarët, në veçanti u ndal tek dezinfektimi i objektit ku janë të vendosura shoqatat e dala nga Lufta e UÇK-së ku janë të vendosura edhe një mori shoqatash tjera dhe në atë objekt kemi frekuentim të madh të qytetarëve.

Lutfi Gërguri, drejtor i DBF-së - pasi i përshëndeti të pranishmit, sqaroi se shuma e mjeteve financiare të shtuara, propozoi që të alokohen 50,000.00 € nga projekti "ndërtimi i tregut për prodhues vendorë", ndërsa 50,000.00 € tjera nga projekti ndërtimi i rrugëve lokale.

Xhafer Tahiri, kryetar i Komunës së Vushtrrisë - njoftoi kuvendin se komuna jonë në sajë të gjurmimit ka rezultuar se është prekur nga pandemia e quajtur covid-19, ku dy qytetarë kanë dalë pozitiv me këtë virus pas testeve të bëra nga personeli shëndetësor, ndërkohë që janë gjurmuar të gjitha kontaktet e mundshme. Në vazhdim ai apeloj tek anëtarët e kuvendit që me një duartrokitje pesë minutash t'i nderojmë punëtorët shëndetësor, policët, inspektorët dhe punëtorët e maketeve për punën e tyre që po bëjnë në kohë pandemie. *Në vazhdim kuvendi me duartrokitje pesë minuta nderoi këto kategori të shoqërisë.* Pastaj ai njoftoi se nga data 26 mars ekipet e QKMF-së së Vushtrrisë, kanë ofruar asistencën e tyre në pikën kufitare në Jarinjë. Tutje ai falënderoi ekipet komunale, shtabin emergjent, drejtorët, policët, punëtorët dhe të gjithë qytetarët për përgjigje pozitive në respektimin e masave për parandalimin e kësaj pandemie, si dhe për solidaritetin e treguar nga të gjithë. Ai bëri thirrje që të përmbahemi nga komentet lidhur me të prekurit nga corona-virusi. Uroj që të mos kemi viktima në njerëz nga ky virus dhe që kjo gjendje të tejkalohet me sa më pak pasoja. Tutje ai njoftoi se komuna ka ndërmarrë të gjitha masat për parandalimin e kësaj epidemie, ku është bërë dezinfektimi i objekteve publike dhe me përpikëri po zbatohen rekomandimet e IKSHPK-së, po ashtu janë dezinfektuar objektet kolektive dhe ashensorët, bizneset janë urdhëruar që bukën ta shpërndajnë në formë të ambalazhuar. Ai ceku se për shkak të restriksioneve ekonomike gjendja sociale e qytetarëve është vështirësuar dhe kësajsoj kemi rritje të numrit të qytetarëve që kanë kërkuar asistencë sociale. Në këtë kontekst për zbutjen e kësaj gjendjeje kanë kontribuar shumë donatorë si: viva fresh, interex, bashkësia islame, Kryqi i kuq e shumë akterë tjerë me pako ushqimore e higjienike kur deri në momentin që po flasim janë ndihmuar afër 600 raste me asistencë sociale dhe familje tjera me gjendje të rënduar ekonomike. Pastaj njoftoi se ka plan që bashkë me qeverinë qendrore të ndërmarrë masa për rimëkëmbjen ekonomike, duke investuar afër 10,000.000 € për bizneset e vogla dhe të mesme në formë të subvencionimit të kamatave për këto biznese. Ideja është që të krijohet burim financiar për çdo biznes të Vushtrrisë për të zhvilluar dhe rritur aktivitetin ekonomik. Tutje falënderoi DKA-në dhe Ministrinë e Arsimit për organizimin e mësimit online dhe kërkoi angazhim nga të gjithë prindërit për ofrimin e ndihmës në mësim për fëmijët e tyre. Mandej ai u zotua se në shtabin emergjent komunal do të përfshihen edhe propozimet e bëra nga opozita dhe anëtarë tjerë të kuvendit do të bëhen pjesë e shtabit emergjent. Sa i përket prokurimit publik, ceku se KRPP-ja i ka lejuar komunave që të shfrytëzojnë kontratat e negociuara me operatorët ekonomik për

furnizim me ushqim dhe pako tjera sanitare si rezultat i rëndimit të gjendjes ekonomike të qytetarëve. Në fund ai bëri thirrje për unitet politik për luftimin e virusit të padukshëm pandemisë covid-19.

Sylejman Mehulli, drejtor i DSHPS-së - sqaroi se Komuna e Vushtrisë, fatmirësisht e ka pasur të kontraktuar shërbimin e DDD-së deratizim, dezinfektim dhe dezinfektim, dhe kjo e ka lehtësuar shumë punën në dezinfektimin e objekteve publike dhe atyre kolektive publike, krejt kjo me qëllim të prerjes së rrugës të virusit corona. Në fund ai bëri thirrje për unitet politik përtej agjendave ditore politike, duke e bërë kështu top prioritet shëndetësinë e komunës, dhe veçanërisht intensifikimin e përpjekjeve të përbashkëta për luftimin e pandemisë covid-19.

Në fund të diskutimeve lidhur me rendin e ditës, kuvendi pas votimit me vota “unanime” aprovoi këtë:

R E N D I T E

1. Shqyrtimi i Propozim-vendimit për rialokimin-transferimin e mjeteve financiare nga kategoria e investimeve kapitale në kategorinë mallra dhe shërbime;
2. Shqyrtimi i Propozim-vendimit për ndarjen e mjeteve financiare për blerjen gjërave të ndryshme për parandalimin dhe mbrojtjen nga pandemia e njohur si corona-virus apo Covid -19.
3. Të ndryshme.

1. Shqyrtimi i Propozim-vendimit për rialokimin-transferimin e mjeteve financiare nga kategoria e investimeve kapitale në kategorinë mallra dhe shërbime

Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:

1. Me këtë vendim bëhet transferimi i mjeteve financiare nga fondi dhjetë (10), në kuadër të programit Infrastruktura publike me kod 18184, nga kategoria investime kapitale me kod të projektit 47826 në kategorinë mallra dhe shërbime në shumën prej tridhjetë mijë euro (30.000.00 €).

2. Nga fondi (21), bëhet transferimi i mjeteve financiare në kuadër të programit Infrastruktura publike me kod 18184, nga kategoria investime kapitale me kod të projektit 47826 në kategorinë mallra dhe shërbime në shumën prej njëzet mijë euro (20.000.00 €).

3. Nga fondi dhjetë (10), bëhet transferimi i mjeteve financiare në kuadër të programit Infrastruktura publike me kod 18184, nga kategoria investime kapitale me kod të projektit 90226 në kategorinë mallra dhe shërbime në shumën prej tridhjetë mijë euro (30.000.00 €).

4. Nga fondi dhjetë (10), bëhet transferimi i mjeteve financiare në kuadër të programit Infrastruktura publike me kod 18184, nga kategoria investime kapitale me kod të projektit 47838 në kategorinë mallra dhe shërbime në shumën prej dhjetë mijë euro (10.000.00 €).

5. Nga fondi dhjetë (21), bëhet transferimi i mjeteve financiare në kuadër të programit Infrastruktura publike me kod 18184, nga kategoria investime kapitale me kod të projektit 47838 në kategorinë mallra dhe shërbime në shumën dyzet mijë euro (40.000.00 €)

6. Nga fondi dhjetë (10), bëhet transferimi i mjeteve financiare nga Programi Planifikimi Urban dhe Inspeksioni me kod 66425 në Programin Infrastruktura publike me kod 18184, nga kategoria investime kapitale me kod të projektit 49579 në kategorinë mallra dhe shërbime në shumën prej njëzet mijë euro (20.000.00 €).

7. Nga fondi dhjetë (10), bëhet transferimi i mjeteve financiare nga Programi Planifikimi Urban dhe Inspeksioni me kod 66425 në Programin Infrastruktura publike me kod 18184, nga kategoria investime kapitale me kod të projektit 41424 në kategorinë mallra dhe shërbime në shumën prej pesëdhjetë mijë euro (50.000.00 €).

8. Shuma totale e mjeteve financiare të komunës, të cilat transferohen nga kategoria e investimeve kapitale në kategorinë mallra dhe shërbime, është në vlerë prej dyqind mijë euro (200,000.00 €).

9. Ky vendim hyn në fuqi ditën e aprovimit nga ana e Kuvendit të Komunës së Vushtrrisë dhe nënshkrimit nga ana e kryesuesit të kuvendit.

2. Shqyrtimi i Propozim-vendimit për ndarjen e mjeteve financiare për blerjen gjërave të ndryshme, për parandalimin dhe mbrojtjen nga pandemia e njohur si corona-virus apo Covid -19.

Lidhur me këtë pikë të rendit të ditës, kuvendi pas votimit me vota “unanime” vendosi me sa vijon:

1. Nga buxheti i komunës – kategoria mallra dhe shërbime, lejohen mjete financiare në shumë prej 200,000.00 € (dyqind mijë euro), për financim të masave dhe veprimeve, të cilat duhet të ndërmerren nga Komuna e Vushtrrisë në parandalimin e përhapjes së COVID-19 me qëllim të mbrojtjes së popullatës nga kjo pandemi dhe për çështje tjera si në vijim:

1.1 Blerjen e mjeteve mbrojtëse, barnave dhe pajisjeve të nevojshme shëndetësore për punëtorët shëndetësorë, administratës së komunës, mjeteve dezinfektuese dhe çdo gjë tjetër që do të jetë e nevojshme për parandalim dhe mbrojtje të kësaj sëmundjeje.

1.2 Blerjen e pakove sociale (pako ushqimore dhe higjienike) për familjet në gjendje të rëndë sociale, në vlerë prej 50.00 € (pesëdhjetë euro) për familje.

2. Mjetet financiare në shumën e cekur si në pikën paraprake të këtij vendimi të sigurohen nga njësitë buxhetore të komunës, në të cilat ka mjete të mjaftuara për këtë qëllim.

3. Shfrytëzimi i këtyre mjeteve të bëhet konform procedurave të caktuara ligjore, si dhe konform vendimeve të miratuara nga Qeveria e Republikës së Kosovës, për masat të cilat

duhet të ndërmerren për mbrojtjen e popullatës, bazuar në rrethanat e krijuara nga rreziku i infektimit dhe përhapjes së COVID-19 në Kosovë.

4. Për zbatimin e këtij vendimi obligohen: Drejtoria për Buxhet dhe Financa dhe njësitë tjera buxhetore të komunës nga të cilat do të bëhet sigurimi i këtyre mjeteve.

5. Ky vendim hyn në fuqi ditën e aprovimit nga ana e Kuvendit të Komunës së Vushtrrisë dhe nënshkrimit nga ana e kryesuesit të kuvendit.

Mbledhja përfundoi në ora 17:20.

Bastri Duraku



Procesmbajtës

Nasuf Aliu

